



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima



tir yimym

TAPAK 7

Chelsea-i euro million 121 yong  
Enzo Fernandez alizük

Nikki Haley-i US tir election  
nübuyim tenzüksü



VOL. XX NO. 111 (ADOK 111)

DIMAPUR

YANGTEPNÜ (THURSDAY)

TSÜKLAI (FEBRUARY) 02, 2023

₹ 5.00

## SST-i tetsür ka ket nung Rs 1 crore apu

**Kohima, February 1, 2023 (TYO):** Bodbarñü Election static surveillance team (SST)-i Kohima nung tetsür ka ket nung Rs 1 crore tema bena aliba apu. SST ketdangsürtemi Kohima district kübok Khuzama interstate check gate nung Manipur number aliba gari ka mita repringdang senji apu, ta osang

angazük. Senji Income Tax Department ket nung agütsüogo, ta ketdangsür kati ashi. Ketdangsürtemi tetsürila den sen puogo aser election maparen nung political party kar atema amshitsü asü masü metettsü atema asüngdangya südar, ta osang ajanga ashi.

## BJP sorkari Union budget nung tiyazü dang nangzük: Congress

**Dimapur, February 1, 2023 (TYO):** BJP sorkari Union budget sayaba nung nübortem anisatsü atema tiyazü tenangzükbatem agir ta Congress-i aitsüogo.

Rs 89,400 crore nung Rs 60,000 crore dang lemzüksü. Iba ajanga sorkari aria mebilemba sayur aser Nagaland nunga nübortem timtem asoshi mebilemtsüba sorkar ka lir. Kechiba sorkar nung alir shingaia iba onük mejembir" ta Sujata Paul-isa asüngdang.

"2018 küm Union budget nung India kübok yimtsüngtem nung nüngdabatem enoka liasü aser iba ajanga India tasenba alizüng tashi itshitsü ta ashi saka Nagaland atema kecha maliasü. Nagaland-i kecha melemzükbi tejashitsüka lir" ta AICC Media Coordinator, Sujata Paul-isa.

"Bodbarñü Centre-i budget kanga junga sayaogo saka iba ya election budget dang lir. Assembly election agitsü aliba state asem indang budget nung kecha mebenok" ta laisa ashi.

Centre sorkari Northeast state tem nem senotsü agütsütsüla aser iba atema DoNER ministry lir saka senotsü matonger, ta lai ashi.

BJP-i 2018 assembly elections matongdang 'yimten latettsü atema election' yimym ayimoktsü aser nübortemi tang tashi yimten latettsü atar, ta laisa metetdaksü.

## Special Expenditure Observer-i video conference agi

**Dimapur, February 1, 2023 (TYO):** February 1, 2023 nü Nagaland Legislative Assembly 2023 election atema Special Expenditure Observer B R Balakrishnan-i senden ka ayonga menogo.

conference ajanga senden amen. Senden nung Special Expenditure Observer-i ketdangsürtem dang election nung sen tashi amshiba azüoktsü atema metetdaksü.

Iba senden nung Special Expenditure Observer den Nagaland Chief Electoral Officer V Shashank Shekhar, IAS aser State Police Nodal Officer nungeri Central & State Enforcement Agencies; Police, Income Tax, CGST, DRI, State Taxes, NCB, ED, CISF, RPF, Assam Rifles, Bank, Airport aser Forest ketdangsürtem den video

Election tiptema aser ochishia agitsü atema sen tashi aser votes angutsü atema ozüing alema inyakba maparen ajak noktangsüla, ta Balakrishnan-i ashi. Paisa ketdangsür telok balalai election agitsü osang sangoktsüba sülen senotsü, yi aser mozütem apuba atema tenüngsang agitsü aser maneni law & order aziüoka ayutsü atema inyaktsü ayongzük.

## Nagaland nung election mapa shitak dang inyaka arudar: CEO Candidate shingaia tenüng magütsü; Rs 20 crore tema puogo

**Kohima, February 1, 2023 (TYO):** February 27 State Assembly election atema maparen tiptema dang inyaka arudar ta Nagaland Chief Electoral Officer (CEO), V. Shashank Shekhar-i ashi.

matongdang general observers 16 aser police observers 16 arutsü, ta paisa shisem. January 19, 2023 nungi MCC tenzükba sülen Nagaland nung flying squad team (FST), static squad team (SST), Police aser Income Tax department telok balalai Rs 20 crore shi alang sen, yi, mozü aser election nung alemba osettem puogo, ta CEO-i ashi.

abener nisung 2,034-i agütsüogo, ta CEO-isa ashi. Election mapang tensa süngjema ayutsü atema nisung 269 tashi 107 CrPC indang preventive sections kübok sota lir aser teti ozüing alema inyakshir nisung 593 tashi 110 CrPC indang preventive sections kübok sota lir.

"Election tiptema agitsü atema maparen ajak renemogo aser tanü agi anogo tanabuba nomination anogo süka candidate shingaia tenüng magütsü" ta CEO Shashank Shekhar-i ashi. Model Code of Conduct (MCC) tenzükogo aser iba atema expenditure observers 24 tashi aruba pei pei telongtet nung mapa lemzüksüogo, ta pai ashi.

Mongulbar tashi nung Rs 35,69,150 cash, Rs 2,24,10,824 alang yi litre 35,716.589, Rs 16,27,00,000 alang mozü seret 2.57 aser Rs 1,19,90,040 alang freebies (3,080 Kgs of areca nuts) puogo, ta paisa metetdaksü.

Nagaland nung service voters 7,983 dena vote enoktsür ajak agi 13,17,634 lir.

Ano, February 7 nü nomination tatembangba anogo

Nagaland kübok police station balala nung licensed arms

Vote enoktsürtem rongnung arishi küm 80 tema Senior Citizens 36,403 aser PwDs 6,970 lir.

Election atema Central Armed Police Force (CAPF) indang company 305 lemzüksüogo aser iba nungi company 75 aruogo.

## Finance Minister Sitharaman-i Union Budget 2023 benok

**UNION BUDGET 2023-24**  
WHAT'S CHEAPER WHAT'S COSTLIER?

**COSTLIER** **CHEAPER**

**ELECTRONIC HOUSE CHIMNEY** **BICYCLE, TV**  
**GOLD, SILVER UTENSILS** **MOBILE PHONE**  
**PLATINUM, CIGARETTE** **EV CAR, LED TV**  
**JEWELLERY, FOREIGN GOODS** **DIAMONDS (MADE IN LABORATORY)**

**New Delhi, February 1, 2023 (Agencies):** Finance Minister Nirmala Sitharaman-i Bodbarñü Parliament nung Union Budget 2023 sayaogo.

lir, Covid vaccination drive tulu agiogo aser arrtsülen shilem tajung agir" ta lai metetdaksü.

atema Rs 6,000 crore agütsütsü" ta Sitharaman-i ashi.

"Amrit kaal nung iba ya mezüngbuba budget lir. Iba ajanga taoba budget ajanga tamendakdak yanglua aliba yangertsü aser India küm 100 jungmong asoshi sentong atongtsü" ta Sitharaman-i ashi.

Centre sorkari taruba küm ka atema PM Gaarib Kalyan Anna Yojana kübok 'priority households' nem jangotsü angati agütsütsü atema scheme tenzükogo. Iba asoshi Centre sorkari Rs 2 lakh crore endoktsü ta finance minister-i ashi.

2014 nungi medical colleges 157 lapokogo aser iba den külemi nursing colleges 157 lapoktsü ta laisa Health Education & Skilling indang jembidang ashi.

Union Finance minister-i o jembidang rongsenketzüng renloksü, infrastructure & manufacturing wadang ajungkettsü aser mapa adokdaksütsü indang jembidi.

"Onoki Amrit Kaal atema alizüng ayuba nung technology aser knowledge ajanga aniba rongsenketzüng amentettsüba lir. Iba alizüng atongtsü atema 'sabka saath, sabka prayaas' nüngdaker" ta Sitharaman-isa ashi.

Tanurtem aser tainlonglong atema National Digital Library ka lapoktsü aser iba nung kaket ajak angutsü, ta finance minister-isa ashi.

India rongsenketzüng maparen shitak dang inyaka arudar aser tayongzükbatem ajuruaka tarutsü tajung ajurutsü. India-i aika inyaktetba ajanga alima nung jenjang temabai atur. India nung digital public infrastructure balaka yangerteta

Laisa agricultural sector nung mapa aika inyaktsü osang metetdaksü aser iba nung animal husbandry, dairy aser fisheries dak rangloker agricultural credit target Rs 20 lakh crore ajungkettsü dena lir.

Maneni, India sorkar inyakba scheme Pradhan Mantri Awas Yojana asoshi Rs 79,000 crore lemzüksür aser Indian Railway budget ji Rs 2.40 lakh crore alitsü. Iba ya 2013-14 asoshi budget lemzüksüba nungi tuguben agi teimba lir, ta laisa shisem.

Shishilembar ajak ket nung Permanent Account Number ka alitsüla aser PAN ya Digital Systems ajak nung identifier ka ama amshitsü ta laisa ashi.

## SANGDONGER

Ao Baptist Pastors' Fellowship ajanga Mokochung Town nung Clean Election Prayer Rally sentong ka akatsü renema lir. Anungji Ao Arogotem ajak nungi toklang tenzükertem ajak meranga longsotepa arua atentsü metetdaksür.

Iba den Mokochung Town nung aliba arogotem aser temeket yimtsüng balala nungi amangbapur ajaki iba sentong nung arua atentsü ayongzük.

Anogo : 7th Feb. 2023

Mapang : 8: 00 Am to 11:00 AM

Tesentepdak : Public Ground Mokochung

Sd/-

Sd/-

Rev. Meren Pastor  
President, ABPF

Rev. T. Lanu Pastor  
Secretary, ABPF.

### Kohima District indang Election Expenditure Monitoring Team senden amen



Kohima district indang Expenditure Observer temi Deputy Commissioner, Kohima indang Conference Hall nung February 1, 2023 nü senden amendang EEM Cell ketdangsür den jembiba noksa nung angur.

**Dimapur, Tsüklai/February 01 (TYO):** Aruya aliba State Legislative Assembly Election 2023 dak sendakba nung 9 Kohima Town A/C, 10 Northern Angami - I A/C aser 11 Northern Angami -II A/C indang Expenditure Observer Samatha Muliamudi aser 8 Western Angami A/C, 14 Southern Angami - I aser 15 Southern Angami - II A/C indang Expenditure Observer Suraj Bhan Garhwal IRS nati Deputy Commissioner, Kohima indang Conference Hall nung February 1, 2023 nü Election Expenditure Monitoring (EEM)

Cell indang shilem ka ama election ketdangsür ajunga den senden ka mena liasü. Iba senden nung jembidang Observer temi EEM Cells kübok team balala nem mapa nunglokja aliba indang osang tejangja agitepa liasü. Parnokisa team balala indang teinyaktsü aser shilem balala indang nung rangloker jembiba aser pei nem nungloktsüba mapa süoki ia inyaktüsü ashi. District nung election maparen tajungtiba nung agitettsü asoshi ajaki amalitep akatsüla aser iba atema onok

arua lir, ta Observer temi ashi. Election Commission of India ajanga agütsüba temzüng-ozüing ajak shidak inyaktüsü aser nungloktsüba mapa inyaktüsü kati-ka den tajungtiba nung amalitep akatsüla, ta ashi. Deputy Commissioner & District Election Officer, Kohima, Shanavas C IAS ajanga ECI totuyuba ama EEM Cells kübok team balala tenteta aliba indang osang agüja liasü. Election osang sangdongba anogo nungi team balalai mapa inyaka aruba indanga pai tongmelang agi lemsatepa liasü.

### DC & DEO Kohima ajanga Medical Board atema metetdaksür

**Dimapur, Tsüklai/February 01 (TYO):** 14th Nagaland Legislative Assembly, 2023 atema aruya aliba General Election dak sendakba nung Polling Personnel/ Grade IV staff ama shimteta alir Official/ Staff ajak aser medical ground

nung exemption atema application agüja alirtem Medical Board dangi tsüngtong arutsüla, ta Deputy Commissioner & District Election Officer, Kohima, Shanavas C IAS ajanga sangdong ka nung ashi. Medical Board ya Naga

Hospital Authority Kohima (NHAK) nung tenteta lir aser February 4, 2023 anepdang 9:00 ako nungi amentsü. Medical Board indang recommendation dak alaka danga report kecha magizüktsü, ta sangdong ajanga ashi.

### Department of Health & Family Welfare ketdangsür den tepila sentong agi



**Dimapur, Tsüklai/February 01 (TYO):** Department of Health & Family Welfare ajanga Principal Director, Dr. Temjentsungla aser Joint Director, Dr. Obangjungla na den tepila sentong ka February 1, 2023 nü DHFW Lobby nung agia liasü. Iba sentong nung tesemdanger tongti ka ama Y. Kikheto Sema, IAS, Commissioner & Secretary, HF&W Govt. Of Nagaland dena liasü aser pai mapa nungi anisüngzüker lenir anaprong nem tenüngsang agütsü aser tepela nung anisüngzüka alitsü moaja liasü. Ibai mangyimba anogo ka masü saka küm 34 tashi mapa inyaka aruba asoshi benjongba anogo ka lir, ta pai ashi. Kikheto Sema-i ashiba agi, Principal Director menden nungi anisüngzükla Dr. Temjentsungla ya ketdangsür khenyongi balaka lir, shibai temolung agüja temolung teindang nung inyaka aru aser mapa agi sayuba tetsür

ka lir, shiba establishment balala 13 tashinung tenzüka aru aser department asoshi mapa tajung jenti inyakogo. Principal Director ka ama la den mapang tatsüka inyaktü angkratema inyakogo, ta pai ashi. Iba sentong nung pa ajanga Principal Director tasenba, Dr. Vibeitunuo Mepfuo shimba official order Dr. Temjentsungla-i amokja liasü. Dr. Temjentsungla-i iba sentong nung jembidang la kübok aliba ketdangsür aser staff temi la den yaritepba asoshi pelaba lemsatepa liasü. Department indang Directorate den tesendaktep lenmang yanglushiteta atema temolung asüba lai lemsatepa liasü. Dr. Temjentsungla-isa sorkar dang Adhoc employees atema bilemetsütsü mepishi aser parnoki yariba amajok mekumdaktsütsü asoshi regularization atema reservation kar yutsütsü shia liasü. Tanüingba ketdangsür temia

maneni Adhoc pur atema reservation yutsütsü imlar, ta lai shia liasü. Dr. Obangjungla, Joint Director ajanga iba sentong nung jembidang tepila sentong tulu ayongzüka atema pelaba lemsatepa liasü. Lai department tenzükdang yimya tasen balala angazükba indang ashi aser tanüingba ketdangsürtem ajungmesotsü mechi lai takok aser sempet balala anguba indanga lemsatepa liasü. Iba sentong nung Dr. Ritu Thurr, Mission Director NHM menden liasü aser Dr. Vibeitunuo Mepfuo Incoming Principal Director ajanga sempet aser kulizüing kaket tem agüja liasü. Sentong tenzüka Dr. Thomas Keppen Deputy Director ajanga sarasadem, Miakhriehu Yhome UDA ajanga temeja ken ka aten aser sentong tembanga Dr. Bendangtula Deputy Director (AYUSH) ajanga sarasadema liasü.

### DC & DEO Mokokchung-i election training agitsü sangdong

**Dimapur, Tsüklai/February 01 (TYO):** Deputy Commissioner & District Election Officer, Mokokchung, Shashank Pratap Singh ajanga sangdong ka nung ashiba agi, taoba mapang sangdonga aliba alema aser Representation of the People Act 1951 indang Section 26 kübok tashi agüja aliba amshia aruya aliba 14th Nagaland Legislative Assembly, 2023 atema General election dak sendakba nung presiding officer, 1st Polling Officer, 2nd Polling Officer, 3rd Polling Officer aser Grade-IV ama election duty inyaktüsü asoshi Mokokchung District kübok

Government employees indang draft yanglur. 1st Round training ya February 2 aser 3, 2023 nung agitsü, 2nd Round training ya February 10-11, 2023 nung agitsü aser 3rd & final round training ya February 17-18, 2023 anogotem agitsü. Mokokchung District kübok Head of the Department/ Offices ajak dang pei establishment nungi shima aliba ketdangsürtem ajak iba training nung adeni yoktsü tuyur. Sorkar mapa inyaker kari Election training/duty nung medenra Election law kübok merenshitsu, ta sangdong ajangasa ashi.

### DC Mokokchung ajanga loud-speaker kumdanga amshitsü tuyur

**Dimapur, Tsüklai/February 01 (TYO):** Noise Pollution (Regulation and Control) Rules, 2000 indang tzüzüing-ozüing dak sendakba nung Supreme Court of India ajanga totuyuba agüja aliba busema aruya aliba school examination mechi tsünglanglen agüja aliba totuyubatem shidak amshitsüla, ta Deputy Commissioner, Mokokchung, Shashank Pratap Singh, IAS ajanga sangdong ka nung metetdaksü. 1. Nüburtemi amshiba tesentem kong loudspeaker mesüra public address system mesüra danga yimyatem amshir, yangji ola ya ambient noise standards 10dB (A) mesüra 75dB(A) dang tema masütsüla.

2. Public emergency dak alaka aonung (aonung 10:00 ako aser anepdang 6:00 ako tsüngta) shingaiia drum mesüra tom-tom matemtsüla mesüra jangzü mapotsüla mesüra instrument mesüra sound amplifier kecha mamshitsüla. 3. Jurila meyong sound system indang peripheral noise level ya 5dB (A) dang tali masütsüla. 4. Industrial area nung anüingdang asosho permissible limit ya 75dB aser aonung 70dB asütsü. Commercial area nung 65dB aser 55dB asütsü aser nisung aliba tesem nung anüingdang 55dB aser aonung 45dB asütsü.

### NBSE ajanga Head of Middle School tem dang metetdaksür

**Dimapur, Tsüklai/February 01 (TYO):** Directorate of School Education, Nagaland (Government & Private) kübok register süa aliba Class-VIII aliba Middle School tem indang Head tem dang NBSE offline programme amshia kaketshir indang tejangja renemtsü aser kasaji (Form No.8) academic calendar nung shia aliba ama mapang shidak (4th April -18th April 2023) nung portal: nbsenl.edu.in nung upload asütsüla, ta Nagaland Board of

School Education ajanga metetdaksü. Tang tasen upgrade süa aliba recognized middle schools (Govt. & Private) temi kaketshir indang tejangja upload asütsü asoshi NBSE portal nung register asütsü asoshi temelaba meshitsüla. Mapang shidak nung Class-VIII nung azünger kaketshir indang tejangja upload masüba school tem ya nil enrolment school ama züngshitsü, ta metetdaksü.



Kohima Police ajanga mapang balala nung sen lakh 25 jenjang Indian Made Foreign Liquor (IMFL) apuba February 1, 2023 nü KMC dumping site Meriema nung Chief Judicial Magistrate, Kohima aser police nungi teshimtet nisungtem matsüngdang raksa indok.

### Budget nung Defence Ministry nem sen 5.94 lakh crore lemezüksü



February 01, 2023 nü Parliament nung Union Budget benoktsü atema apusotsü lia Union Finance Minister, Nirmala Sitharaman den Ministers of State Bhagwat Kishanrao Karad aser Pankaj Chaudhary nunger tangokba noksa nung angur.

**New Delhi, February 01 (Agencies):** Tang China linük den arrotsülen mepetmesü aliba mapang nung Union Budget nung defence ministry nem sen tera tali lemezüksüogo.

Yaküm Defence Ministry nem sen 5.25 lakh crore lemezükja liasü aser tan budget nungbo sen 5.94 lakh crore lemezüksüogo.

Bodhbarnü Parliament nung Union Budget benokba mapang nung Finance Minister, Nirmala Sitharaman-i, sen 1.62 lakh crore bo capital expenditure atema lemezüksür; iba nungjagi raraba hadir tasen, raraba tayimtsü, raradang amshiba rong aser tanga raraba hadir balala alitsü, ta metetdakja liasü. 2023-24 budget nung sen

crore 2,70,120 revenue expenditure atema lemezüksü; iba nungji itasen agütsüba aser kiojen anepaluba nung indoktsü densema lir.

Iba dak alia sen crore 1,38,205 defence pensions atema lemezüksü.

Union budget nung defence atema lemezüksüba sen ajak agi crore 5,93,537.64 lir.

### ASI-i Minister Naba Das khasettsü ponguben meranga liasü: Police

**Bhubaneswar, February 01 (Agencies):** Taoba Amongnü (January 29) Odisha nung police officer kati state health minister, Naba Kisore Das khaseta liasü.

"Hopta ana tashi police officer jagi minister khasettsü ponguben tashi meranga liasü. Tesüsa January 29 nü Jharsuguda district kübok Brajarajnaragar jila nung assistant sub-inspector, Gopal Krushna Das-i maongka ngua minister dak teku nung anaben khaloktsü," ta Mongolbarnü Odisha Police crime branch-i metetdaksü.

Iba tatalokba sülen ASI, Gopal Krushna Das mapa nungi anentsüogo.

Hopta ana tashi Gopal Das-i Minister, Naba Das'er kiyong nung minister itangita liasü. Pai kiyong nung alirtem dangji minister ainlen lir asü kidang lir? tasa asüngdanga aru.

"Pai mapang balala nung ponguben tashi minister kong aliar metetpelaba mapang shiaji minister kidang maliasü. Mapang ajak nung Gopal-i pa indang service pistol ji amshitsü renema dang liasü," ta crime branch officer kati metetdaksü.

Minister-i Brajarajnaragar semdanga sentong ka nung

adentsü alibaji anogo ana jelia Gopal Das-i metetba sülen nungi pai minister khasettsü asalentong yanglu, ta police-i ashi.

Gopal Das dang asüngdangyaogo aser pai minister khasettsü tebilemba aliba nangzükogo.

Police-i ashiba agi, tamalen Gopal Das-i minister ajurua par kinünger ka nem mapa agüjang, ta mepishia liasü iba dak alia pa Berhampur anasa aliba police station-i transfer yoktsü mepishia liasü, saka minister-i memelungba agi pai mangyanga minister khaset.

Police officer kati, "Gopal-i par kinünger ka nem mapa agüjang ta mepishiba dak alia ita asem tejaklen pai minister ajurua pa par jila Berhampur nung aliba police station-i transfer yokang ta mepishir. (Minister) Naba Das-i telangzüba junga magütsüba ajanga pa mezüngmeshiogo ta bilema pa kanga jashia liasü," ta metetdaksü.

Minister-i Brajarajnaragar semdanga sorkar office tasen ana semzüksütsü aliba anogo nung traffic acchaayangtsü atema Gopal Das nem mapa

lemezüksü; iba maongkaji agia pai minister mena aliba gari anenba mapang nung ilonga oor minister dak teku nung injang anaben khaloktsü. Iba tatalokba sülen Naba Das chopper ajanga Bhubaneswar nung aliba Apollo Hospital-i anir ao, ajisüaka mekümzükleti kasa aonungjisa asü.

Injang ana rongnungji kati temelungjang aser tepokpok tabelen naprongla kongshia liasü.

Ano tanga osang ka nung, osangbenertem den jembidang MKCG Medical College & Hospital, Berhampur nung Psychiatry department nung tongti, Dr Chandra Sekhar Tripathy-i, Gopal Das ajungbena ain adokba mesüra shisatsü melenshiba tashidak agi shiranga liasü, ta ashi.

Tripathy-i, "Küm 8-10 shi tejaklen Das-i kü clinic semdanga liasü. Pa melamelasa ain adok aser iba atemaji treatment agia liasü. Pai mozü shidak achir asü machirar ni memetet saka mozü shidak mechira iba tashidakji tanaben adoker. Pai tesüsa clinic semdangba sülen küm ka jungogo," ta metetdaksü.



February 01, 2023 nü Bihar yimtiba, Patna nung Bihar Industries Association (BIA) nungi Industrialist temi Union Finance Minister, Nirmala Sitharaman-i Parliament nung Union Budget 2023-24 benokba reprangba noksa nung angur.

### Lok Sabha election nung rangloker budget benok: Dimple Yadav

**New Delhi, Tsüklai/February 01 (Agencies):** Centre sorkari 2024 küm Lok Sabha election nung rangloker Union Budget benokogo, ta Bodhbarnü Samajwadi Party MP, Dimple Yadav-i aitsü.

Parliament senden tembangba sülen osangbenertem den jembidang lai, "Iba Budget ya elections nung rangloker benokba budget lir. Sorkari middle class purtem tera anisüngzüksüsa budget benokogo saka aluyimertem atema Minimum Support Price (MSP), mapa adokdaksütsü aser lanurtem atemabo kecha mesangdong," ta metetdaksü.

Laisa, budget agi melung masür, kechiyong budget nung Railways mezüngok, ta ashi.

Ano külen la kinüngerbu aser Samajwadi Party Tir, Akhilesh Yadav-ia, BJP-i aniba Centre sorkar union budget ajanga osettsüset nung jenjang atutsü

aser linük nung mapa manguba tebilemstsü tuluba kümdaksütsü, ta aitsü.

"BJP-i budget benoka arur küm ter ajunger, aser iba mapang nungji parnoki nüburtem atema kecha magütsü nung kodaser asenoki tan budget nung imlatsü? BJP budget ajanga osettsüset jenjang atutsü aser mapa manguba tebilemstsü tuluba akümtsü. Aluyimertem, aayangertem, lanurtem, tetsürtem aser mapa balala nung mongintem atema kecha mali," ta pai ashi.

Bodhbarnü Lok Sabha senden nung Union Finance Minister, Nirmala Sitharaman-i Union Budget 2023 benok aser tang agi tasembenbuba sorkari 'paperless' budget benokogo.

Parliament budget tenzuka Mongolbarnü linük Tiri jembiba sülen 2022-23 kümsük atema Economic Survey benoka liasü.

### Kashmir nung rürjep anenzüka aluba lendong nung bendanger ana asü

**Srinagar, February 01 (Agencies):** Bodhbarnü Jammu & Kashmir kübok Gulmarg nung aliba ski resort nung rürjep anenzüka aluba lendong nung Poland nung raliwalir ana asü aser nisung 21 kümzükogo, ta osang ka ajanga metetdaksü.

Bodhbar anüngdang 12:30 ako meta bendanger 21 den parnok anir senzür lisopur ana Hapatkhud Kangdori nung aliba ski slopes nungji liasü, ta police-i metetdaksü.

Iba lendong nung nisung ana

asü aser Baramulla district police-i rürjep agi anenbanga aliba nisung 19 bo kümzükogo.

Asükwa mongpu shia raliwalir noklang aikati iba resort semdang.

Tenük kuli alir- Karnataka nungi All India Congress Committee züngsem, Deepak Chinchore-i, "Onoki iba lendong atalokbaji tenük agi ngua liasü. Süklep 20 shi rürjep temalen nungjagi alu aser rürjep jagi parnok ajak anenbang," ta metetdaksü.



February 01, 2023 nü Chennai nung ayongzükba G20 Education Working Group senden nung Union Minister of State for Information & Broadcasting and Fisheries, Animal Husbandry & Dairying, L. Murugan-i jembidang tangokba noksa nung angur.

### Linük shingai technology tasen lemsatsü memelunger: Manoj Pande

**Pune, February 01 (Agencies):** Bodhbarnü Indian Army tongti, General Manoj Pande-i, tanü lima security tensa nung linük shingai technology tasentiba lemsateptsü memelunger, ta ashi.

Anungji kanga tongtibang technology atema tanga linüktem dak memetaloktsüla aser asenoki research & development mesendoktsüla, ta paisa metetdaksü.

Pune kübok Dighi nung Army Institute of Technology (AIT) 29buba Foundation Day sentong nung tongti tejaoker o jembidang General Pande-i, "Linük atema security ji tangalen nungi agitsü makok mesüra tangar dak metaloktsü makok," ta ashi.

"Indian Army-i itemji atangji meteta lir. Onoki tangar dak memetaloktsü saka technologies tasen atema inyaksü telemtetba agia inyakdar," ta pai ashi.

"India nunger industry temi tang nüngdak meteta inyakdar. Nenok ama mongintem (engineering students) ajanga iba ya inyakdar. Mapang tatsüka tsüngda linük nung eco-system tenzükter aser defence industry nungiter," ta pai ashi.

Iba sentong nung General Pande-i tangar dak alakteta ajunger kaketshirtem nem tenüngsang agütsü aser kaketshirtem dang linük atema senso tajung kaka akümtsü ayongzükba liasü.



## TIR YIMYIM YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 02, 2022

### Election nung lanurtem

Lanurtem ta asüdang aiben asenoki parnokji kum kwi nungi kwi tashi nung lanur asütsü ta bilemer. Atangji, alima nung lanur ka asütsüba kumji alima ajaklen ya dang agidi ta lateta maka, ajisüaka mapa inyakyim nung bentettsü asoshi United Nations-ibo nisung ka arishi kum 15 nungi 24 tashi purtem dang lanur (youth) ta ajar. Asenok asoshibo aji mapettsüa akok, kechiyong asenokbo kijung lanurtema lir, anungji nisung ka arishi kum 40 tashibo lanur ta asüba rongnung tendaktsü nung dang lanur ta asüba rogotemi alima asoshi mapa tajung tulu inyaktettsü. Ano lanursa süaka, pa mesüra la arishi kum 18 majung tashibo linük temzüng agi election nung shilem agitsü makoker, anungji election nung shilem tulubalen ka agitsü purtemji lanur arishi kum 18 nungi 40 tashi purtem asütsü. Aji oda, tang Nagaland election nung vote agütsütsü pur nisung lakh 13 dak tali alibatem rongnung arishi kum 40 teküpok alirtem kanga agia teimba lir, anungji parnokji koba telok nungi shirnok shimdir, itemji asenok ajak asoshi yimsüsür asütsü. Item lanurtem rongnung tang mezüng vote enoktsütettsüa arishi kum 18 abensar tenüng zülüoka alirtemji meyrirjang 24 dak tema lir. Talisa item mezüng vote agütsütsü purtem asoshi democracy nung pei madak yimsü asütsü atema yimsüsür shimba nung shilem agiba temeten aser maongkaji kanga tulu asütsü. Iba jagi parnok nem yimten nung senso ajak den kasasa shilem agitettsüa tashi anguba parnokji metettsü. Ibaji tepelatsüka aser jangratemtsüka lir. Iba jagi election dang ya Democracy benjong, Festival of Democracy, ta ajar. Atangji, election mapang ya senso shia asoshi yimten nung yimsüsür shimtsü temeten anguba Democracy benjong lir. Ibai rarateptsüba mapang masü mesüra sensosangertem rongnung vote ayokba aser aliba mapanga masü. Election mapang ya anogo shia pei lima aser nübortem asoshi nungdak yimten ken o benoka jembia shisarenba mapang ka lir. Aji oda, election anogo nung senso ajak mungdang amai adenshir pei pei mapang nung pei pei vote pei mulungba nung enotsür pei kidangi aotsübaji yimten aser lokti nung senso ka asoshi meraket nümadangtsü mapa ka lir. Iba meraket jenjangji meteta lanurtemi kodang election nung shilem agidir, atangji election ya pei lima tajungba - tajungba kuma yanglushitsü tenzüka anogo ka akümtsü. Ajisüaka, asenok ajak atema tia majung kaji, democracy ajanga agütsüba temeten aser tashi amshia pei lima tajungba kuma yanglutsü bilema election nung shilem agitsü melen, lanurtem aika election mapang tangar lu nung ayanger ama akümer. Aji oda, election agiba ajanga peisasa inyaktetba mapa kabo inyaktettsüa tashitemetet, nübortem meimba shisatsü aser lanurtem asoshi teinyaktsü mapa inyaker meinyakma teyutettsüa tokolok shisatsü aliba nisung shimtsü melen, tanü atema süngojemtsü sen agütsür, moko sali aser yi teperi agütsür, techinertem asoshibo drugs dena agütsür nisungang shimra, atangji lanurtem asoshi lanur putu kodanga marutsü. Lanurtemi angatettsübaji lanur putuji lanurtem tambur tantsür kumer arutsüba putu masü, saka lanurtem lanur asüba mapangji lanur putu lir, anungji tambur tantsür masü lanurtem-ang election nunga tokteptsüla aser lanurtemi anir pei pei alidak tesem ajak nung election ya Democracy benjong amonger ama pelatepa aser ochishia pei vote enoktsütsü ajungshiteptsüla. Tesem ka nung yimkong meyong vote nisung ka anati enokbaji masü, mesüra election nung vote agütsütsü asoshi yimkong tenüng nung kari lemtetbajia masü, saka mezüng vote enoktsütsü purtem nema maongka shitak agüja pei lima nung yimsüsür shimba sentong nungji meraketketa shilem agidaktsütsüla. Election ya lanurtem sen agi aliba benjong ka masü, mesüra lanurtem nem yi jemdaktsüba aser drugs chidaktsüba benjonga masü, saka lanurtemi anir alima yangluba Democracy benjong anogo ka lir. Iba anogo nung kari lanurtem nem yi jemdaktsür, drugs chidaktsür aser prangpong injang agütsür rarateptsü asoshi sen agi hadir ka ama amshitsü merangra, lanurtemi item dangji ma ta shitettsüla aser tetsü tasoli meimer lanurtem shiai lanur putu asoshi tokolok shisatsü aser tenük terbang adenba lenir ochi agi shimtsüla.

## OLEMSABANG

### AZÜMESEN ASER LALUSHIPONGBA AGI KIBONG SENAK TIA-i YIDAKTSÜR

- L. Kika Pongener

(Yashi adok nungi...)

Ano kibong nung tsüraburtemi metettsüba kanga tongtipang kaji, itasen tila agi ariana kibong mesur sernung, pei chirnur dang kaa-ita alir amai mashitsüla, chirnur nem itasen kwi angur, aser kibong tia indang kanga junga angatetdaksütsüla, aser pei kibong jenjang apir chirnur libalirodaksütsüla. Chirnur aikati pei tsürabur jenjang masadangi Mobile Phone & Motor Cycle amala sen tasak jenjang meshiba, oda tsürabur itasen anguba ajunga agi Mobile Phone jenjangji dang atutsüa jenjang tasak amshiba lanurtem aika lir. Asen Naga nungeri kibong/taküm atema nungdakba, kobala medeni asenok kibong/taküm alitsü makoktsü, aser ano nungdakba osettsüset sernung karbo makayongjia kibong/taküm odang litettsüba, ibala telemsa ana ya mebendangtetba agi kibong tali sensak atener. Tatishitsü agi jangotsü, metsü-mersu, toztü-sapon, apen-suoshi, chirnurtem shisaliok, temang anema alitsü asoshi mozü-mora, itemji medeni asenok kibong/taküm melitettsü. Ajisuaka, Gari amala, mesura sen tasak agi dang alitettsüba osettsüsettem (Luxurious goods) shirnoki alitsü/mesutettsü akoker parnok atemabo kanga junger, saka shirnoki makoktsü parnok atemabo makayongjia odang litettsüba sernung, saka item ajakji akatsü arishidang sentsüh-ang talila tsühloka sensak tiai aiba kibong aika lir. Asen Naga nunger dak aketba jakla-yimya kaji, itasen tila agi ariana kibong mesur, mesura aayanga dang tanü poksünga kibong mesua alir, saka tular/takar akaba/amshiba osettsüset ajak akatsü/amshitsü penbur/arishir, aser aji pei sasa meranga inyaker bena aruba sen agi alia agir masü, saka tangar dang sen tetemlok 'Interest' agi apoh'er alir, aser idangji kibong sensak tiai ayir. Ano kinungtsür aikati pei kinungbur jenjang masadangi, pei kibong 'Income source' den meputepi 'High-level' nung libaliroba ajanga sentsüh tali tsüluka sensak atener. Tsüngrem o-i yamai ashir, "Nisünga kati kecha maka yur pei sasa takar akümer; Tangar kati rongsen tulu yur pei sasa sensaker kuma sayur" (A.Shin-13:7). Anungji akok tashi pei kibong tashi yari libaliro shia lira, takar'sa masüyongjia pei kibong sasep sentsüh makai tepok süngaa chiyunga-jema litettsü.

Ano tanü putu nung asen Naga nunger aika sorkar mapa-a kecha meinyaker, private/company mapa-a kecha meinyaker aser alua mayimer, saka o-lu yima, o tanang bangso-banglema jembia meshimetsüa kibong taküm mesua alir aika lir. Ano karbo Minister/MLA/Commissioner/Director/Engineer/Contractor etc. yamala mesukba tular/takar kar dak metaloker kibong mesua chiyunga-jema alir-a aika lir. Ano karbo Election aruba shia Election lu yima kibong mesua alir-a lir. Kanga junga bilemdangra, asen Naga nunger ya teimba ka jangbong tzüma lima nung yur alir, oda metsü-mersu tashi tzüma lima nungi bener aruba dang chia-jema alir. Mapang kar nung Assam nungeri lenmang mokdangar par lima nungi anogo ishika 'Ration' bener matutet nungbo asen Naga nunger ya kanga timatemsü, mesura ita ishika lenmang mokdangar 'Ration' bener matutet nungbo, Naga lima nung ayawara arutsü aser aya agi nisünga aika sumahitsü. Kechiyong asen Naga nunger shingaa jang-o-tsü maliba mapang, iba melena achitsüsa kecha tsünuteta/züsenteta mali, oda tangar dak dang metaloker ayung-ayunga kecha tebilemetsü meikai liteper. Anungji mapang kar nung koda mesui-ka jang-o-tsü mengura iba melena chia atatsü atema asenok sasa aluyima bongalashi/alishi aser manu/nu-bo kibong ajaki tsünua alinungbo, ibajagi aya agibosa mesui taküm kumzüksü.

Asen Naga nungeri asen lima nung mapa inyaka kibong taküm mesua alitsü asoshi mapa kecha maka amai bilemer aser bangpettsü amai jembir, saka asen lima nung tzümartembo mapa inyakera meinyakmai jangradema aayanga takar kuma alir. India lima tesem balala nungi tzümartem aika pei lima nung mapa makaba agi asen lima nung arua mapa inyakera meinyakba takar kuma alir. Ano Nepali aser Bangla Deshi nunger aika asen lima nung aayanga takar kuma alir. Ajisuaka, asen Naga nungerbo mapa kecha maka sensaka liteper, kechiyong asen Naga nungeri asentsü sena mapa meinyaki ayung-ayunga dang chia-jema dang linur. Asen lima nung alu ayimtsü ali-arem peria kar sernung, azümesenba agi, mesura aluyimtsübaji jenjang ilaa akümer amai bilemba agi mapa kecha maka ta bangpettsü amai jembia kazüteper. Aji oda, asen lima nung tzümartem inyakba mapatem ya asenok 'local' nisüngai melenzüka inyaknungbo asenok mapa ya inyakera meinyakmai akatsü, aser parnok amai takar kuma alitsü lenmang sadem-sadema dang lir. Asen Naga nunger dak aketba jakla yimya kaji kecha maka yur o-bo tulu-lu jembir, pocket nungbo poisa temerem kata semoka mali sernung tzümar chanu/mia nunger chanu kati 'Saheb & Mim-Saheb' ta ajadang joka-tua pelaseter, saka pocket lapoka repringtep nungbo ashiko, asen dang 'Saheb & Mim-Saheb' ta ajasang tzümar chanu ka pocket nung semoka aliba-jia atoksaa semoka malitsüa shibai metet...!!!??? Tsüngrem o-i ashir, "Züsenba ajak nung tajangzük lir, saka terbang agi jembiba agibo anungakong dang tendaktsür" (A.Shin-14:23). "Anualemba teka agi sensak atener, saka teinyak teka agi takar kumdaktsür" (A.Shin-10:4). Tenyar Paul-i ashi, "Nisünga kari mapa meinyakra pa techiyungdaksü; Kechiyong nenok rongnung nisünga karbo azümesena kecha meinyaki kazüa dang aliba indang onoki angashir" (2 Tesa-3:10-11). Ano asen Naga nunger aika dak yimya supaba tamajungtiba kaji, mapabo kecha meinyaknur, saka chiyungtsübo tajung dang chinur, oda shi/ango dang chinur. Shirnoki pei sasa mapa meranga inyaker aser achi-ajemba nung azüoka tali shia liteter, parnokbo pei kibong sasep peria chiyunga-jema anisüngazüka alitsü. Kodang kibongtem sensaka timtema lidir, ibajagi kimang-sosem (Family circle) kibongtem dena timtemdaksütsü, aser kodang yimtsüng ka nung aliba kibongtem sensaker teimba sudir, ibajagi yimtsüng kaji sensak tiai yidaktsütsü, aser ano ibajagi iba linükji rongsenkettsüng jenjang kanga mejungi kumdaktsütsü. Anungji kibongtem takarsa masüyongjia pei kibong sasep tepok süngaa chiyunga-jema litettsüa, senso ajaki azümesena meli-i mapa meranga inyaktsüla, aser pei kechi aka aji agi tenük süngaer, pei tashi yari chiyunga-jemer, pei kibong jenjang yari aben-suoshi subor tali shia alitsü kanga tongtipang lir. Kechiyong azümesen, chidiyungdi aser lalushiponga libaliroba agi kibong kaji sensak tiai yidaktsür.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngeru angateta agitsü mepishir**

## Pope Francis-i alima linüktem dang Congo yaritsü ayongzük



January 31, 2023 nü Democratic Republic of the Congo yimtiba, Kinshasa nung Tir, Felix-Antoine Tshisekedi-i jembidang Pope Francis-i repranga aliba noksa nung angur. Kasa senden nung Pope Francis-i Congo nung tongti ketdangsertem, yimtenren lenirtem aser lokti tentet balala nungi lenirtem den jembiogo.

**February 01, 2023:** Congo nungertem ya alima nung aliba senti osettem mesüra ali nungi adokba rongsentem dang nungi kanga sentiba, ajisüaka rara sapurtemi parnok aika tepsetogo, ta Mongolbarnü Pope Francis-i ashi.

January 31, 2023 nü Congo Tir, Felix Tshisekedi, sorkar ketdangsertem, yimtenren lenirtem aser lokti tentet balala nungi lenirtem den senden amenba mapang nung Pope Francis-i, "Iba linük ya kanga tulu aser iba linük ya Africa atema tangu sashidak lir, ajisüaka rara agi mejungi kongshiba ajanga tangu sashitsü timtemer," ta ashi.

Sensak tia, linük telung nung nüburttem jenshiba, ozüing alema inyakba mapatem aser rara ajanga Congo nungertem kanga timtema arudar. United Nations aser meimchir temeden atema inyakba organizations-i ashiba agi, tang iba linük nung prangpong amer telok 100 dak tema lir, aser talisa anüdoklen kiralongrartemi timtem agütsür.

Congo linük ya linük 9 den arrtsüa lir aser iba linük nung diamond den ali nungi adokba rongsen jenti lir. Africa nung Catholic nütsüng teimba aliba linükji Congo lir.

Pope Francis airport nungi gari nung linük yimtiba, Kinshasa tashi aoba mapang nung nisung meyirjang aika lenmang tiplen nokdaker pa agizüka liasü. School tanurtema aika uniform semer Pope Francis agizüka liasü.

Lenir noklang aika den jembidang Congo Tir, Tshisekedi-i tesüiba putu aika Congo nung tesünep liasü ajisüaka tesüiba küm 30 tsüngda yimjung anemertem aser kidanger linüktem nungi kiralongrartemi yimjung raksatsüogo, ta ashi.

Tiri Pope dang, "Atangji alima linüktemi ola madokba ajanga nisung million 10 dak tema tepsetogo. Mashisa densema tai maket tetsürtem aika tashiyim amshia raksatsü aser yirutsü, lanurtem aser tanurtem terok-zü rangdangtsü,

kanga tantsür-tamburtem aser tanurtem aikati pei ki toktsür tesünep bushia nemzütsüsa aküm, aser ibaji kiralongrartemi Congo nung rongsen nukshiba ajanga lir," ta metetdaksü.

Ibaji langzua Pope Francis-i, Congo nung nisung jenti tepsetba aser timtemba ya alimai metettsüla, ta ashi.

"Iba ama azükaru lima nung anguba senti oset ajak dang nungi nenok kanga sentiba," ta pai ashi.

Pope-i Congo nungertem dang, nenoki nenok dak langa aliba akhümtsübu akhangtsüla, ta ashiba den külemi linük nung yimtenren lenirtem danga merumeru mesüra tashi dang nungibo ajak ajungtsü atema inyaksü ayongzük.

Pope-isa alima linüktem dang Congo yaritsü mepishi.

"Diamond ya angutsü kanga tasak saka yangibo kanga molamoshia angur," ta pai ashi.

"Yangi senti osettem ali telung nung lir, ta asübaji atangji süra nenok melungjang nung tanelar rongsenji atangji asütsü. Temelungjang nungi yimjung adoker aser terenlok akar, kechiyong Tsüngrem teyari ajanga nüburttemi ochi temeden angur aser tai tokteter," ta pai ashi.

Congo nung ajaki agitsüsa shilem kaka lir, ta shia Pope-i, "Nisung melungjang mesüra tebangmechi nung rara aser tesempa telidaksü, kechiyong ibaji meimchir dak mapet aser Khristan dak mapet," ta ashi.

Diamonds atuba nungi tenzuka senotsü tsütsü rara adokba dak sendakba nung pope-i, "Merumeru miim ajanga (Congo nung) diamonds azü agi süngogo," ta ashi.

"Terenlok aliba linüktemi Congo nung lendong aliba atema aiben tenük amor, tenarong aser tebang shibanger saka merumerua Congo dang nungi 'coltan' (phone nung amshiba mineral) den tanga senti osettembo alir," ta pai ashi.

Pope kati Congo tesüsabuba semdangbaji küm 37 tejaklen liasü.

Tamalen Pope-i Congo semdangba mapang nung N'dole airport nung tekülem sentong nung adentsü atema nisung million 1 shi adenshia liasü.

Bodhbarnü linük yimtiba, Kinshasa nung Pope-i, "Africa nung Catholic ainer. Iba ya Arogo tarutsü atema lir. Africa nung Catholic Arogo ainba ya tarutsü Catholic atema kanga tongtibang," ta ashi.

United Nations-i ashiba agi, Congo nung rara ajanga nisung million 6 bo tesem balala nung jenshiogo aser parnok teimbaka South Kivu, North Kivu aser Ituri provinces nung lir.

## Bethel prayer Home Mokokchung branch nung counselling tenzükogo

**Mokokchung, February 01 (TYO):** Bethel prayer Home Mokokchung branch nung counselling tenzükogo, anungji timtem shisabulu khuret abenertem, shirangertem mesüra sarasadem nüngdakbapurtem arua

temoatsü agizükdaksüner, ta Bodhbarnü Bethel Prayer Home Mokokchung branch Secretary, Amenla Yaden-i sangdong ka ajanga metetdaksü.

Yaküm December 13 nü Ungma Baptist Arogo nung pastor, Rev. Dr Noklen-i

Alisüngküm, Mokokchung nung Bethel prayer Home Mokokchung branch building tasenba meshitetja liasü aser tangbo sarasadem aser counseling ajak tenzükogo, ta kasa sangdong ajanga metetdaksü.

## Benue State nung Muslim Fulani teloki Khristan 12 tepset

**Abuja (Nigeria), February 01 (Agencies):** Nigeria nung ketdangsertem dang Fulani Muslim nung meyirjang aika Benue state-i odar, ta jelia tekümdangtsü osang metetdakja liasü, saka parnoki ibaji zübazüba toktsüba ajanga Honibarnü (January 28) Fulani teloki yimtsüng ana amakba mapang nung Khristan 12 tepsetogo, ta osang ka ajanga metetdaksü.

Fulani teloki Kwany County kübok Ichembe aser Mbaigbe yimtsüng na amakba mapang nung Khristan 12 tepset aser aika yirutsüogo; parnokisa ki aser alu raksatsü, ta Turan People's Assembly (TUPA) general coordinator, Michael Aondohemba-i metetdaksü.

"Onoki jelia ketdangsertem dang Fulani meyirjang aika Benue ayongzküm anasa onok aliba tesem tonga arudar, ta tekümdangtsü osang metetdakja liasü. Onoki security agency balala dang onok yaritsü mepishi, ajisüaka onok yarir maruba ajanga tai maket nisungtem lendongi ai," ta

Aondohemba-isa metetdaksü.

Iba tesem nungji alir, Joseph Asawa-i osangbenertem dang, yimtsüng ana nung Funali teloki tepsetba nisung 12 pronglaji Khristantem lir, ta metetdaksü.

Asawa-i, "Parnoki Khristan 12 tepset aser yimtsüng ana nungjagi Khristan aika jenshiogo aser tang parnok Jatoka jila nung jenoka lir," ta metetdaksü.

Aondohemba-i, Fulani telok jagi tarutsü nunga yimtsüng aika amaktsü, ta ashi.

Pai Nigeria sorkar dang tang rongdak süa Khristantem kümzükang, ta mepishi.

Aondohemba-i, asür pongubo Tersugh Iorliam, Tersoo Samu, Ngolo Ndera, Ternenge Asaku aser Udoji Penda nung liasü aser tanger tenet tasü mangji hospital nung yua lir, ta metetdaksü.

Nigeria National Assembly nung züngsem, Bob Tyough-i, Fulani telok aser tanga kiralongrar telok balalai Khristantem amaker, ajisüaka ibaji nokdangtsü atema sorkari kecha meinyakteter ama

reprangteter, ta metetdaksü.

"Meimchir taküm kaji temeshi aser taküm ka tanaben meyipa bener aotsü atema Tsüngrem dak dang temeden lir. Nisung tepsetertem melungjang nungji taochi khenyongi mali, anungji parnoki ajak yanglusang Tsüngrem dang nungi taochi meimlatsüla," ta Bob-i ashi.

"Ni asür Khristan kibongtem den mangyim jashi lemsateper aser parnok nem tesünep agüjang ta sarasademtsür. Asürtemji Tsüngrem den anisüngzükdaki ogo ta amangtsüla aser obendangba anogo nung Yisu Khrista den tanaben tasü nungi shia arutsü ta amanga melung anisüngzük angutsü mepishir," ta pai lemsateper.

2022 küm alima nung Khristantem teimtiba tepsetba linükji Nigeria (5,014) liasü, ta Open Doors' 2023 World Watch List (WWL) report ajanga metetdaksüogo.

Tang alima nung Khristantem alitsü tamajungtiba linük 50 rongnung Nigeria ya jenjang 6buba nung lir.

## ANOGO ABEN TSÜNGREM DEN

### Shidakba temeshi

"O Kibubaji temeshi sobotsü sobur külemang" (t.9). Tsüngremi Pa nüburt temeshi sūdaksüner. Tejen Lai ibai lephsia aiben amshi. Aser tenyar Peteri pa shiti nung zülü (1Peter 1:16). Iba tetezü pilar, mejaja aser tejangja aliba.

Tebu Tsüngrem, Techir Tsüngrem aser Tanela Temeshi asenok taküm temeshi lidaktsütsü asoshi külemi mapa inyaker. Asenok temeshi lidaktsütsü asoshi asen menen atema Yisu Kangki nung asü. Asenok dak Tanela Temeshi lia Pa ain agi asenok temeshi alitsü ajungshir. Tsüngrem O i asenok temeshiba nung aintsü asoshi yarir. Yisui Tebu dang ashi, "Ne ochi agi parnok meshitetjang; Ne O ochi lir" (Yn. 17:17).

Shidakba temeshiji tebur tajung lir; tiyazü temeshibaji tebur majung. Farisee temeshibaji tiyazü temeshi- pei sasa yangluba temeshi. Shidakba temeshiji Yisu, aser Pai nisung pua aru. Fariseetemi parnokji maginü. Tanela tejangtemji- temeim, tepela, yimjung, taremsük aser tesünep- taküm tobur jungdaksür.

Shidakba temeshibaji tobur tajung, aser iba tobur tajungji tekülem nungi adoker. Nai shiba külemer pa mesüka na akümer ta nai metetter ma? Ne Tsüngremji merumeruba Tsüngrem süra na merumerua akümtsü. Ne Tsüngremji tobur mejungra naa tebur majungtsü. Shibai sen külemer paji tekuru asütsü. Shibai jangratema külemer, paji tanük asütsü. Saka shibai ochi aser taküm aliba Tsüngrem külemer pa/la ji tobur tajung asütsü- tali, tali Yisu mesüka akümtsü.

Na temeshi taküm alitsü asoshi Tsüngremi ne nem nüngdak ajak agütsür. Pa o i na sayudakjang aser Tanela Temeshii na anidakjang. Na Yisu mesüka akümtsüsa liang.

AO OSHI ANGAZÜKDAK:

TANÜ ANGAZÜKTSÜBA OJANG

Osangtema

(adj) o tembanga ajak jembiba (discussed thoroughly)

\* Yimkong senden nung onük ajak osangtema jembir telemtetba agi.

Ojungru

(adj) o tanganütsüka omo keta jembiba (eloquent)

\* Ojungru jembiri nisung mulungjang akoker.



OLONG PAITEP # 6416

Grid for crossword puzzle #6416 with numbered squares.

TIPILEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenung ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toklepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6415 TELANGZÜBA

TIPILEN :

- 1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu, 15. Anünü,
16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sükak,
10. Aonung, 11. Dokan,
13. Tinu.

Agüja aliba noksa nung meputepi aliba 9 bushiang



G20 teshimtet nübotemi Kaziranga National Park semdang



Guwahati, February 1, 2023

(Agencies): G20 teshimtet telok ka Bodbarnü Assam tonga aruogo aser parnoki Kaziranga National Park semdanga liasü.

World Heritage Site indang Bagori aser Kohora Range nung ainertem jeep safari ka nung anir senzü. Iba ya masüdüng parnoki Kohora nung aliba Kaziranga Convention Centre semdanga liasü.

Idakji ketdangsurtemi parnok dang Kaziranga National Park ketdangpurtemi arem shiruru anepaluba indang osang metetdaksü.

India-i December 1, 2022 nü Indonesia ket nungi G20 presidency agizükba sülen tang

mezüng atema G20 summit ayonger.

Iba sentong ya "Vasudhaiva Kutumbakam" (One Earth One Family One Future) omen nung ajemdaker ayongzüker.

India-i December 1, 2022 nungi tenzüker November 30, 2023 tashi G20 Presidency inyaksü.

Asian financial crisis sülen G20 ya 1999 küm Finance Ministers aser Central Bank Governors indang forum ka ama tenzüka liasü.

G20 (Group of 20) nung linük 19 aser European Union dena lir. Linük 19 ji Argentina, Australia, Brazil, Canada, China, Germany, France, India,

Indonesia, Italy, Japan, Republic of Korea, Mexico, Russia, Saudi Arabia, South Africa, Turkey, United Kingdom aser United States of America lir.

Taküm G20 summit nung guest countries 9 den International Organisations adener. G20 summit nung shilem ka ama Guwahati aser Dibrugarh nung senden pungu amentsü.

Guwahati nung February 2 nungi 3, 2023, February 6 nungi 8, 2023, March 13 nungi

March 15, 2023 aser April 3 nungi 5, 2023 tashi amentsü.

Maneni Dibrugarh nung March 24 nungi 25, 2023 tashi amentsü.

BJP national president JP Nadda-i Tripura semdangtsü

Agartala, February 1, 2023

(Agencies): Tripura nung assembly election agitsü jakdang BJP nüboyimba maparen ajungkettsü atema BJP national president JP Nadda-i semdangtsü.

February 3 nü pai Unakoti district nung lokti sentong ka nung adentsü.

Nadda-i state semdangtsü aliba atema taoba chief minister & MP Biplab Kumar Deb, Labour Minister Bhagaban Chandra Das aser BJP election in charge Dr Mahendra Singh nungeri Unakoti district

semdangogo.

Unakoti district kübok PWD Ground nung BJP national President JP Nadda-i lokti sentong tulu ka nung o jembitsü ta MP Biplab Kumar Deb-i ashi.

"Iba sentong nung Unakoti district nungi BJP candidate ajak adentsü. JP Nadda-i Centre aser state sorkartemi terenlok mapa inyakba osang metetdaksü" ta pai ashi.

Külen, Trinamool Congress lennir aika den Trinamool Congress stars campaigners-i Tripura semdangtsü sentong lir. February 1 nü All India

Trinamool Congress-i star campaigners indang osang metetdakja liasü.

"Mamata'er tangatetba sülen Tripura nung terenlok aika arutsü. TMC tongti lennir aikati Tripura nung nüboyimtsütsü" ta Tripura Pradesh Trinamool Congress-i metetdaksü.

February 6 aser 7 anogotem All India Trinamool Congress President Mamata Banerjee aser All India Trinamool Congress National General Secretary Abhishek Banerjee nati assembly elections atema Tripura semdangtsü.

AR-i Manipur nung Pangolin shells shibelenba noktang

Imphal, February 1, 2023

(Agencies): Assam Rifles indang Tegnoupal Battalion ajanga Pangolin Shells shibelenba maparen ka putetogo.

Osang tejangja ka angazükba sülen AR telok kati Tegnoupal kübok Khudengthabi yimtsüng mita

aodang Pangolin Shells seret 5.190 apu. Iba indang jenjang ya Rs 5.19 Lakhs shi asütsü ta asadangtetogo.

AR sepaitemi apuba Wildlife Products ji Forest Department, Moreh ket nung agütsüogo.

Ano, Shangshak Battalion-ia Gamnuom yimtsüng nung

süng shibelenba noktangogo.

Assam Rifles sepaitemi Shaktiman truck gari ka nung süng bena aliba apu aser süng indang jenjangji Rs 1.28 Crores ta asadangtetogo.

Süng aser gari den shibelenertem Forest department, Kamjong ket nung agütsüogo.



HQ IGAR (North) kübok Assam Rifles, Shamator Battalion ajanga February 1, 2023 nü CHC Shamator nung teintet rogitem aser matamabensar nem Wheelchar lema agüja liasü.



Mitkar temi tashiyim amshia taoba lenir Aung San Suu Kyi'er sorkar atsüngdoker küm ana ajungba anogo Thailand nung aliba Myanmar nungertemi Bangkok, Thailand nung aliba Myanmar Embassy tezülen la indang noksa amer longkak aitba noksa nung angur. Mitkar temi tashiyim amshia sorkar atsüngdokba anogo Thailand nung aliba Myanmar nungertem longkak aita among. February 1, 2021 nü Myanmar mitkar temi State Counsellor Aung San Suu Kyi aser Tir U Win Myint atsüngdoka civilian sorkar laodaktsü.

## Asian military senden nung adentsü Myanmar jaok

**Bangkok, Tsüklai/February 01 (Agencies):** Thailand aser United States nati külemi ayongzükba regional military senden nung adentsü atema Myanmar military jaokogo, shirnoki küm ana tejakdang sorkar atsünga liasü.

Maritime Security dak sendakba nung anogo pongu amentsü aliba ASEAN Defence Ministers' Meeting Plus (ADMM-Plus) Experts' Working Group senden ya February 20 nü tenzüksü kong "table top" exercises densema lir.

Independent online publication Myanmar Now-i, iba senden nung adentsü Myanmar jaokba osang Hombarnü metetdaktsü aser ashiba agi, parnoki leak asüba kuli kaket ka nguogo, kong search & rescue, piracy, tesemepba mozü, prangbong hadir aser nisung shibelenba ken o sensaksemtsü asoshi benoka aliba sayuogo.

US Department of Defense otongdar Lieutenant Colonel Martin Meiners-i Myanmar Now dang ashiba agi, ASEAN inyakyim dak ajemdaker Myanmar military

iba senden nung adentsü jaokogo.

"ASEAN forum tem nung shilem agitsüba ya ASEAN züngsemtemi telemtetba agir," ta Meiners-i ashi.

Association of Southeast Asian Nations (ASEAN) kübok züngsem 10 den külemi iba senden nung dialogue partner Australia, China, India, Japan, New Zealand, Russia, South Korea, aser US nungi lenirtemi shilem agitsü.

2021 küm February 1 nü Myanmar nung military-i sorkar atsüngba sülen ken o bentettsü atema sentong yangluba sülen Myanmar yimsüsü aliba general temi manidakba ajanga ASEAN asoshi ken o bentettsü tasak kümogo aser sensaksemtsü asoshi sabang tajung ka meyangluteti arudar.

Iba lokti tentet yagi Myanmar military lenirtem parnok indang senden tuluba nung shilem magidaktsü, saka küm ana tashi azütokshi lendong atalokba sülen züngsemtem karibo ASEAN dang National Unity Government (NUG) den inyaksangshitsü ayongzükogo.

Iba sorkar ya military-i atsüngtokba sorkar kübok yimden yimsüsürtemi amenokba lir.

Indonesia-i 2023 küm nungi chairmanship abentsü atema Cambodia melenzükogo, aser parnoki Myanmar anema jenjang tesashiba agitsü imlar.

Jakarta-i, NUG den inyakshitsü pusema aruogo aser November ita tir Joko Widodo-i, general tem ya ASEAN indang summit tongtiba nungi dang masü saka tanga inyakyimtem nung shilem magidaktsü ayongzükogo.

Senior General Min Aung Hlaing kübok military-i ashiba agi, parnoki taküm küm August ita tashi nungbo election ayongzükba agitsü.

Nüburtemi election ajanga shimba lenir aser Myanmar nung yimden yimsüsürtem rongnung ajanga dang nüngtugutiba Aung San Suu Kyi, anema ken o balala benokba sülen la tepuokdak küm 30 dak tema ayutsü atema obendang agütsüogo.

Myanmar ya 1997 küm taoba military sorkar mapang ASEAN nung dena liasü.



France indang retirement age ajemtsüba sentong mechi Paris nung aliba Invalides monument nung longkak aitba tatemdang riot police temi longkak aiter sadangtsüba noksa nung angur. Iba sentong nung misung million ka dak tema shilem agidaktsü meranga liasü, koba Tir Emmanuel Macron indang sorkar asoshi tongtipang tetendangba ka lir.

Office of the  
**Nationalist Democratic Progressive Party (NDPP)**  
26 Aonglenden A/C Mokochung Region

**SANGDONGER**

Tir Yimyim Vol XX No 108 (Adok 108) January 30, 2023 nung 26 Aonglenden Assembly Constituency NDPP active member aser primary membership nungi anener taoba MLA Wb. Toshipokba Longkumer, yaritsü ta sangdongba nisungtemji, mapang talangka nungi party-i ashiba mangai aru nung party temzüng nung aliba ama meeting mena 22nd January, 2023 anogo nung parnok party nungi anentsür liasü. Külem tenzükba arudang parnok dak alaka tanüngba nisungtemji pei designation-a memetet tiyazü nübur dang sangdongba reprangteter.

Anungji tarutsü nungibo pei tenzükba tenüng aser designation tejangja meteta nübur tenzük nungbo kanga ajungtsü.

<b>Sd/-</b>	<b>Sd/-</b>
<b>Nungsangmeren Lkr</b>	<b>M. Sutsung Jamir</b>
<b>President</b>	<b>Gen/Secy. (Admn)</b>

**METETDAKTSÜR**

Asür Merangtsülak Imchen aja lim aser kimongtem Mangmetong Yimlang yimdak lir. Item senmang oset nung shinga kecha teka aitsü makok ta onok senmangertemi tamale telemtetba agia lir. Anungji lemteta lir asünungji shirnokisa shishilembatepa lir, ibaji onoki memetet.

Tarutsü nunga kija mesüra lokti shingaia iba ali, lim aser kimong dak sendakba nung onoki memetet-i shishilembatsü aser sen aputeptsü asoshi memelar.

Iba telemtetba anema shibai inyakdir (sen sentsü süshia, senmangba oset süshia) item ajakji pa/la kija khuret asütsü.

**Merangtsülak-er chirnur aser semchirtem.**

## Nikki Haley-i US tir election nübuyim tenzüksü

**Washington, Tsüklai/February 01 (Agencies):** Tejangja Indian-American Republican Party lenir Nikki Haley-i 2024 US tir election asoshi February 15 nü nübuyim tenzüksü sentong lir, anungji taoba US tir Donald Trump den tokteper la mezüngbuba akumer.

Arishi küm 51 tain Haley ya South Carolina indang Governor ka ama kümsük ana inyaker aser taoba mapang US Ambassador to the United Nations inyaka liasü.

Lai iba tetoktepeba nung tetsüng ajemokba ya taoba mapang lar tanishir den tokteper mezüngbuba akumtsü, shiba tang tashi 2024 nomination asoshi Republican party nungi kisüng lir.

Arishi küm 76 tain Trump ya White House asoshi taoba küm nübuyim tenzükogo. Haley-i la sentong ya video ka ajanga sayutsü, koba tan hopta sayatsü, ta Washington Post ajanga ashi.

Haley-i sangdong ka nung, February 15 nü Charleston Visitor Center nung aliba The Shed nung osang khenyongi alakteta ka sangdongtsü, ta ashi.

Haley tembar ka ajanga January 31 nü la tir asoshi tokteptsü sentong jangjatsü, ta South Carolina nung aliba osangkaket Charleston ajanga ashi.

Trump ya tir asoshi tanaben toktepra lai metokteptsü ta Haley-i jembia aru, saka tawa la temolung melenshia US lenmang balaka nung rangloksü nüngdaker ta ashi.

"Putu tasen ka asoshi ibai mapang lir. Lenir tasen asoshi mapang lir. Aser asen linük

anitsü mapang lir. America nungeri raratsü langa lir aser asenok tenzükba," ta lai tawa tweet ka nung shia liasü.

Taoba ita Fox News den sensaksemba mapang linük lenmang tasen kati anitsüsa US nung lenir ka nüngdaker, ta shia liasü.

"Saka tir atema tokteptsü asoshi repring dang nai tasüngdangba ana nung rangloker. Mezüngbuba nung, tang tasena yagi lenir tasen meshir asü? Tanabuba tasüngdangba ya, lenir tasenbaji ni asü, aser asenok lenmang tasenba nung jajatsü nüngdaker asü? Aser lenirji ni asütsü asü? Hao ni iba lenirji asütsü akok," ta lai ashi.

Iba sensaksem nung Tir Joe Biden nem kümsük tanabuba inyakdaktsütsüla, ta Haley-isa shia liasü.

Arishi küm 80 tain Biden ya US Tir inyaker rongnung tambutisang lir.

Taruba US tir election ya November 5, 2024 nung agitsü sentong lir. Haley asodang Nimrata Randhawa tenüng aja aser la tebu Ajit Singh Randhawa aser tetsür Raj Kaur Randhawa lir, shirnok Punjab nungi Canada bushia aru aser iba sülen 1960s nung US-i aru. La tebu ya Punjab Agricultural University nung professor ka liasü aser la tetsür ya Delhi University nung law degree azüng.

**GARI JABI**  
**SAMAR BUSHIR**

Gari jabi (key) den remote dena indokba nosung kari shia arua lira, iba mobile number nung ya metetdaktsütsü mepishir - 8974200953.

# 8buba FROLIC CUP 2023 tenzükogo



**Dimapur, Tsüklai/February 1 (TYO):** 8buba Frolic Cup February 1 nü medziphema local ground nung tenzükogo. Asayamung lapokba sentong nung All India Football Federation Executive züngsem aser Nagaland Football Federation tir Mr. K. Neibu Sekhose alakteta jaoker liasü.

Sentong nung o jembiba mapang pai, Frolic Club küm 25 abensaba aser lokti ajungkettsü atema maparen balala benoka inyakyonga aruba atema parnok nem tenüngsang agütsü. Asayartem ajungshiba mapang pai Dr. Talimeren Ao tatishitsü bener arua jembi, shiba ball asayatsü atema

ground tapet maliba den ball aser football boot amala meliaka bendanga agüja meranga inyakba ajanga takok tajung nguteta liasü, ta ashi.

Paisa, tanü putu nungbo maongka tajungba nguyonga aoer aser Youth resources department-i football ground tajungba küma yanglushitsüba den maongka aika lapoktsür, anungji asayartemi koba lenmang shimtsü aji parnoki telemetba agitsüla, ta ashi.

Asayamung nung mezüngbuba asaya Medziphema Village Youth Organization aser Starlit FC Moava na asaya Medziphema-i goal 1-0 agi koka liasü. Asaya

nung MVYO atema goal ka ya Thejasetuo-i asaya tenzükog minute 10buba nung idakja liasü.

Tanabuba asaya nung Winfield Club-i goal 4-1 agi Tenyiphe-1 Youth Org ayong ayonga kokogo. Asaya nung Winfield Club atema Lenny, Ayu aser Purakum (2 goals) nungeri goal idaktsü aser Tenyiphe atema goal ka ya Gangchui Pangmei-i idakja liasü.

February 2 nü asaya yamai alitsü:  
07:30am. VFA vs Libra FC  
01:00pm United Falcon Vs Ruzaphema Youth Org.  
02:30 pm Patkai Christian College vs Amigos FC.

## Chelsea-i euro million 121 yong Enzo Fernandez alizük



**Tsüklai/February 1, 2023 (Agencies):** Chelsea-i otsü tasen ka yanglua Benfica nungi Argentina nunger asayar Enzo Fernandez euro million 121 yong alizükogo, ta Benfica-i Bodhbarnü sangdong ka ajanga metetdaksü.

Arishi küm 22 tain midfielder nem ya World Cup nung Best Young Player naroküm agüja liasü. Qatar nung Argentina-i takok ngua asayaba WC nung pai shilem tajung agia liasü.

2021 küm Manchester City-i Jack Grealish atema Aston Villa nem poun million 100 agütsüba ya asayar ka sen timtiba agi alizükba liasü, saka tang Enzo pound million 106-8 agi alizüka otsü tasen ka yangluogo.

Fernandez ya taoba küm July ita pound million 10 shi yong Benfica nung oa aden.

Pai Chelsea den küm ti ser tesadang atema tenanzüktepba ka yangluogo aser pa 2031 küm

tashi iba club nungi asayatsü.

Taoba season tatemi Chelsea alizükba sülen Todd Boehly-i aniba teloki asayar aliba nung sen million noklang aika intokogo. Club tang Premier League nung jenjang 10buba nung lir aser iba nungi jenjang tajungba küma ajungkettsü nükjidong nung parnoki asayartem aika alidar.

Kasa mapang nung Bayern Munich-i Manchester City wing-back Canelo loan nung anirogo aser pa season tatem tashi asayatsü aser iba den teti atema euro million 70 yong pa alizüktsü atema lenmang lapoka yuogo.

Arishi küm 28 tain Portugal nunger asayar ya 2019 küm Juventus nungi City nung arua aden, ajisüaka World Cup tembangba sülen pa Pep Guardiola-i aniba team nung pa jenjang mejangjai kümogo.

"FC Bayern ya club tajung ka aser alima nung club

tajungtiba rongnung ka lir aser tang ni asayar tajungtibatem den külemi asayatsü atema yongya atar," ta Canelo-i ashi.

Maneni Premier League nung temaba jenjang nung aliba team; Arsenal-i Chelsea nungi midfielder Jorginho pound million 12 yong alizükogo.

Jorginho-i Arsenal den ita 18 atema tenanzüktepba ka yangluogo. Pai Arsenal.com dang ashiba agi, "tajangshiba tasen ka atema ni yongya atar aser asayatsü matateter."

"Jenjangtem ajak kanga kara agiyonga odar. Ni terabo süngmanga liasü saka iba tajangshiba asoshi maongka agütsüba ni agizüka liasü," ta paisa ashi.

Arsenal puri 2004 küm nungi tang tashi nung Premier League ken danga koka mali aser taküm iba asayamung akoktsü atema kanga meranga inyakdar. Parnoki Brighton nungi Belgium nunger forward Leandro Trossard aser Italy club Spezia nungi Poland nunger defender Jakub Kiwior alizükogo.

Tottenham puria January transfer window shibangtsü mapang ishika dang lia Sporting Lisbon nungi defender Pedro Porro alizükba metetdaksüogo.

Pa ya season tema asayatsü atema loan nung anir aru aser season tatemi club nungi asayatsü atema tenanzüktepba ka yanglutsü akok.

## ATP Rankings: Novak Djokovic temaba jenjangi tuogo

**Tsüklai/February 1, 2023 (Agencies):** Australian Open nung Grand Slam 22buba akokba sülen tawa sayaba ATP rankings nung Novak Djokovic temaba jenjangi tuogo.

Arishi küm 35 tain Serbia nunger asayar ya jenjang 4 tejakdangi tua temaba jenjang nung aliba Spain nunger asayar Carlos Alcaraz atsüngtokogo, shiba yiruba ajanga Australia Open nung masayateti liasü.

Greek nunger Stefanos Tsitsipas, shiba Deobarnü Australia Open final nung Djokovic-i straight set nung koka liasü, pai Norway nunger asayar Casper Ruud ajateta tasembuba jenjang tongtetogo, koba 2021 küm August ita sülen tang mezüngbuba iba jenjang tongtetba asütsü.

Russia nunger asayar Andrey Rublev, shiba Djokovic-isa quarter final nung tsükdakja liasü pa tang mezüngbuba jenjang pongububai tuogo.

Mapang talangka Djokovic den kanga toktepa arusang Rafael Nadal Australia Open nung tanabuba round nung tsükba sülen pa jenjang pezü aspzüka lua tang trokbuba nung lir.

Melbourne nung semifinal tonga asayaba Russia nunger asayar Karen Khachanov, jenjang tenet tejakdang tua tang 13buba nung lir.

Kasa mapang nung United States nung asayar Tommy

Paul-a top 20-i iogo. Pai Australia Open nung semifinal tonga asaya liasü.

### Top 20 asayartem yamai alitsü:

1. Novak Djokovic (SRB) 7070 (+4)
2. Carlos Alcaraz (ESP) 6730 (-1)
3. Stefanos Tsitsipas (GRE) 6195 (+1)
4. Casper Ruud (NOR) 5765 (-1)
5. Andrey Rublev 4200 (+1)
6. Rafael Nadal (ESP) 3815 (-4)
7. Felix Auger-Aliassime (CAN) 3715
8. Taylor Fritz (USA) 3410 (+1)
9. Holger Rune (DEN) 3046 (+1)
10. Hubert Hurkacz (POL) 2995 (+1)
11. Cameron Norrie (GBR) 2760 (+1)
12. Daniil Medvedev 2750 (-4)
13. Karen Khachanov 2515 (+7)
14. Alexander Zverev (GER) 2425 (-1)
15. Frances Tiafoe (USA) 2305 (+2)
16. Pablo Carreno Busta (ESP) 2285 (-1)
17. Jannik Sinner (ITA) 2195 (-1)
18. Lorenzo Musetti (ITA) 1925 (+1)
19. Tommy Paul (USA) 1835 (+16)
20. Nick Kyrgios (AUS) 1825 (+1)

## Budget nung India nung saisapong atema sen crore 3,397.32 lemezüktsü

**Tsüklai/February 1, 2023 (Agencies):** India finance minister Nirmala Sitharaman-i Bodhbarnü Parliament nung 2023-24 fiscal year atema budget sangdongogo, kong saisapong atema sen crore 3,397.32 lemezüktsüba metetdaksüogo.

Saisapong atema taoba fiscal year dang nungi 2023-24 fiscal year atema sen crore 700 agi timba agütsüogo.

India nung Sports Authority of India-i, asayartem atema national camps ayongzüka agitsür, iba den asayartem nem infrastructure aser equipment tem agütsür, coach tem shimer aser sports infrastructure tem anepalur. SAI nem sen crore 785.52 aser Khelo Indian nem sen crore 1045 lemezüktsüogo.

National Sports Federation nema sen crore 325 aser National Service Scheme nema kasa budget agütsütsü.

2023-24 tsüngda nung National Sports Development nem sen crore 15 agütsütsü.

Taküm budget nung National Centre of Sports Science and Research atema sen crore 13 lemezüktsüogo.

Tanü-asüng putu nung sport science renloka aoba ya kanga tapet aser tongtibang ta angateta iba jenjang agiogo.

Kasa mapang nung National Anti Doping Agency, NADA nem sen crore 21.73 agütsütsü aser National Drug Testing Lab, NDTL kong tetendanga ajak agir, parnok nem sen crore 19.5 agütsütsü.

Asian Games 2023 aser Paris Olympics atongtsü ana nung aliba mapang sorkari iba sector nung sen talila intokba ajanga international jenjang nung India-i takok tajung angutsü atema teyari agütsütsü ta amanger.

2022 nung Commonwealth Games nung India-i shilem tajung agiogo. Birmingham nung iba asayamung asayaba mapang India nungi medal 61 angu, kong gold 22, silver 16 aser bronze medal 23 densema liasü.

Linük nung saisapong ajungkettsü atema tenzükba Khelo India sentong ya kümtem tsüngda aikati kanga junga agizüka arudar aser iba ajanga India nung saisapong balala nung sempet tajung aketba lanur aika jangja arudar.

### BILEMDANGANG

"Mapa tajung inyaktsü mapitetra kecha minyak tajungba."